

四庫全書

集部

欽定四庫全書

明文海卷二十二

餘姚黃宗義編

賦二十二

哀傷二

反招

有序 俞安期

范叔子雲門人也少有彊志博覽善辭君公車業師
心獨造海內學士翕然宗之咸得進用而叔子獨無
顯效因著書以議當世世亦嫉之至老窮絀無聊若

六合之內九州之上無以容其眇然之軀而騁其牢
騷之志者遂營度生瘡築居其旁示與當世訣絕意
足悲矣昔屈原被讒見放其徒宋玉慮其魂魄放佚
乃賦招魂招之其稱楚國之美區區堂與之盛也臺
池之美也陳設之備也修膳之珍也女謁之妖麗也
被服之文織也歌舞之雜沓也飲宴之湛荒也用以
諷諫懷王而異其覺悟以收原辭固偉哉竊恐懷王
昏憤原未必收適開其侈誕之心皇甫謐譏其淫文

放發誇競失體風雅之則於是乎乖諒哉其言也余不自量迺賦反招爰正宋王之夸用廣叔子之意俾其悠悠順化遊魂玄澹窺本原之大同齊死生為一致苟居寂寞之身外馳紛華之志塊處尺五之地結想四方之遊徒絕快意之談蔑忘憤懣之氣得無有張毅之疾以攻厥生而漓厥真者耶遂作其辭曰

肇有厥體魂附麗些
網溫時夜亶不離些
君何佉佉善遠遊些
九州之土行不休些
異方鬼物羈魂是讐些
魂

兮歸來毋奄其銷些魂兮歸來齊魯不可以渴些巖巖
泰山其嶽壇壇些逮此遊魂深以繫些厲飈焉崇樵城
撤室些人其觸之揭而永殪些歸來歸來毋適此軼軻
些魂兮歸來雍秦不可以招搖些自癸及戊女魃驕些
如悞如燥塵歎歎些蘊隆陸海濯濯無毛些觸髅晝行
諸呶呶些偵人肉血食飲饗些青天飛犬聲號號些此
其災象尚不知所遭些歸來歸來毋與禍交些魂兮歸
來蜀道不可以遊般些羊腸蠶叢備險艱些上造參井

下重泉些一瞬不戒疇完厥身些歸來歸來毋卽危以
為安些魂兮歸來交廣不可以少延些火山赤坂置膚
則潰爛些蛇鬼虎狼嘑人以為膳些飛蠱狂遊中人以
為昇些茵露凜凜厲烟煽些歸來歸來毋入以瞑眩些
魂兮歸來閩越不可以周旋些耽耽海民獷愎而營些
人身蛇文中是潛些捫人以戲載浮載湛些歸來歸
來不可與親些魂兮歸來江漢不可休息些赤壤千里
鮮黍稷些炊彼遺粒如金如玉些若教大鬼顛頷而不

得食些汨羅寃臣遭之心爽些魂兮歸來毋貪其殛些
魂兮歸來幽并之土不可以躋些巖風利射膚坼指墮
些高水崇雪人馬咸埋些寒門幽里魂往必迷些歸來
歸來不可以由些魂兮歸來中原不可以暫適些泉我
吳越災殄不絕些旱潦四臻民生天札些儵陵而襄儵
川而燠裂些疫癘淫行道殣如綴些復有子遺烟不黔
突些魂兮歸來俾善息些魂兮歸來帝都不可以相常
些權貴炎炎勳威陽陽些貂璫社鼠恣披猖些朱甍紫

觀焜煌煌些瓊璫金華絢雕堂些蘭宮蕙室網明璫些
變童名倡進成行些華轂約軼巧趨蹌些文筵為藉瑤
席張些鷓鴣膚鳳膏烹些雲飛水潛截其昉些饜棄
芻豢珍異競些甘酸適調椒桂芳些鬱金吳醪汎都梁
些夸毗磬折上壽先些諛言盡甘擊踣連連些援登層
霄抑沈淵些規規良士望難前些虞兩狐管紀其僞些
爰造新令遊客是孿些歸來歸來毋久淹些魂兮歸來
諸侯不可以容些習尚不同行止異適些臺池聲色眩

獵是溺些益高為山鑿深為壑些寫象溟渤儀衡霍些
曲池承流迴斂薄些被罔遵奧施繡幕些吳姬楚艷顏
沃若些曼聲緩氣志靡弱些鄭音趙節遞絡繹些歡樂
煩怠思騁躍些彌山槩藪忽震爚些乘黃飛鷁縱若射
些如黃青散啞遠若權些彈情蕩思歸銜爵些左右侍
御語諾諾些東西是以亶不逆些陳說禮法誰根柢些
矯矯遺直適罹其虐些歸來歸來毋往索些魂兮歸來
冠蓋不可以遊些名位為寶道德贅疣些顯榮幽仄判

不儔些粵有陽慕式相招些
賊鐘飾鼓引筵篋些
瑤觥瓊髓旅獻酬些
白日為失稱好述些
聲氣好合期千秋
些
片辭抵忤成戈矛些
含沙射影潛相謀些
歸來歸來
毋相逐以蹈其就些
魂兮歸來邊塞不可以彷徨些
蠻方遠徵事攻殺以樂康些
跡躡中國攘奪無所懲些
啾啾夜啼此成國殤些
碧血漚草白骨成岡些
敵入不迎去不從些
材官邏卒刈人如董糧些
稜嶒恠相囊之而上首功些
魂兮歸來毋丁此旣亮些
魂兮歸來適新居

些後倚旄丘前清渠些左築場圃右平疇些蕙房衡戶
結中區些木蘭為捺松為樞些蒙以葛縈繚芙蓉渠些周
旅栝栢列栢櫨些濕有女桑叢有茹蘆些珍木異卉鬱
敷華些懸綴皜雪疊緋霞些上集孔翠鳴鷓鷄些淹留
長離振朱鷺些鯪鰕鰓鯉千石魚些驅鷄役犬伍麋麋
些魂兮歸來惟君是愉些魂兮歸來入中堂些曲几四
陳列圓方些蒲葅瓠脯藉蘭芳些蓴絲秋綠擘為羹些
莖角蕨苗枯而為粳些畦瓜五色傾朱瓢些累累林實

充篚筐些陶樽既滌含醴漿些松牀桂架陳縹緗些蟲
書鳥篆列成行些芒芒紀載煥文章些日含月咀擊華
精些尚論五帝揖三皇些誕則玄聖友素王些大庭華
胥恍托身些雲官鳥氏旦暮逢些魂兮歸來樂何窮些
魂兮歸來留密室些從容瑾戶守太默些遊心無始體
道質些絕棄鬱嶮居沕穆些回矚昭曠靜以潔些恬愉
沖漠抱純白些達情遂命齊萬物些綿綿若存保厥一
些古哲是儕歷千祀些亂曰媒媒晦晦兮乘鴻濛齊得

喪兮淪玄風世莫吾知兮循大變以始終羌憂患之不
處兮視紛紜之玄同適天行乎人間兮化則憺遵乎壽
宮

招魂詞

錢琦

萱以清淑勤苦積學成名早拔賢科洵居儀部夫何以
獲罪謫守德慶州客死災方輿櫬艱險歷程五千悲哀
罔及五內割裂父乃長號遠呼升雷四望而招之曰噫
魂歸乎來爾父在堂嗟夫日昃之離爾在土八載其將

疇依噫魂歸乎來妻妾三人未滿四旬四子二女孤苦
伶仃哀聲載道行路之人有不忍聞噫魂歸乎來縱不
於爾父母是念尤當憐室內之無人繫歸來德慶不可
以久住兮瘴氣最惡白日如昏殺人非必十往一存況
夫雕題椎髻何有乎三吳民俗之淳繫歸來南方不可
以止兮蝮蛇蓊蓊封狐九尾巨虺多哆啖人脂髓繫歸
來北方不可以久住兮一望沙漫誰其友隣飛雪千里
層冰如山去不復還繫歸來東方酷熱金石爍流咸池

若木浴日驚濤長人千仞吞噬莫逃繫歸來西方無際
鬼教移人非我族類流沙傾陷弱水難濟繫歸來無上
忉利豐隆震威飛廉插翅縱能力排閭闔帝閭之怒不
可避繫歸來無下幽都河伯馮陵龍師仡仡吞象之魚
深淵莫測魂兮歸來閒以靜止峽山之東景物勝麗父
兄宗族生長故地樂不可言只峽東之春舊屋數椽鶯
歌鶯舞花卉爭妍魂兮歸來恣所適只峽東之夏門牆
幽楚稼穡稠稠黃雞白酒主獻賓酬魂兮歸來恣所飲

只峽東之冬時和歲豐蒸羔烹豚炮鯽炙鳧魂兮歸來
恣所嘗只峽東之曉暘谷始旦萬物畢見峽東之暮崦
嶷滅影月星滿戶其樂無度魂兮歸來尚信汝父

哀黃生賦

有序 湯顯祖

余友黃生名棟里人也年六十矣貌寢孤貧聞遊者
談京師之富冒漲而行止之不得至徐州中暑橫舁
過東平已不任視聽矣至京一日而瞑同里人共瘞
之關南余感其生時醺醺撫壠酸涕下第陸歸不能

致彼故鄉先賦逝言

哀哉黃生生年甚飲今日故人酸君幽寢欲不吞聲嫌
相嘲切欲不陳辭難相飲噎生貪好書仰人眉睫定本
巾箱亡書別篋蠹跡難憑蠅頭自寫獻笑虞初涉略蒼
雅目不知書玉珮金車讀書如此不及侏儒生故無子
求方服食雖有間情曾無弱息不善為容揭露喉齒掉
臂而行槃跚步履故無長志亦復短視忽慕豪華來觀
帝里帝里云何昔我經過夏浸積空江淮沭河濤翻雪

覓漩轉雷渦曲折駭頓寧任風波渡江而馳傲逐驟車
焚輪疾堞牛馬之餘中目凝齒蒙頭變軀懸發有程不
得徐驅寒門暑路礫石峩氷羊腸巖險駮耳摧零公無
渡河余方泣岐拔劍而去不若哺糜生時揮手語謝朋
友帝里豪華誰非白首土風便習豈問奸醜結駟難期
蹈隙時有余聞此言重相止勸凡今之人年輕力健勁
出如鎚巧入如線動止如風舉舌如雷若鬼若神潛形
魄現如瘵如蛔食復轉變承鬣嬉遊侯鯖穢羨生無技

狡獪阿則便古人有言貴不如賤白首華京非生侶儔
號曰強起名為宦遊年高始壯漏盡何憂如生已矣宜
終首丘左思摘白楊雲逐貧人皆有憶我獨無身蠚腸
蠅鬢龜腹鳧脰影必隨形力不敵命河上郵亭別館橫
經妻稱牧犢子字螟蛉希夷自貢怪魅無逢翻為浪士
忽翳雲蹤陰陽之食貧病之容中暘徐邦遊魂岱宗裸
致於京不復省人目直猶視古橫難陳一宿而冥同旅
悲嗔葉瘞都南時服周身他鄉是客異鬼非隣已迷生

路寧識歸津千秋一寄萬里同塵曼曼獨冢遙遙族親
魂飛渺茫過鳥號翔何當拍取還君故鄉

擬招

招兩亡女 沈宜修

槎夕已往蘭會旋臨悠悠生死心乎痛矣杳冥泉臺
無期再見擬楚騷而招之

魂兮歸來閨中弱質豈堪涉彼冥途些繫汝二人昔何
為而來今何為而早徂些使我暮年惟此傷心天何以
控呼些歸來歸來返戶樞些魂兮歸來金風乍涼玉露

冷些秋蘭芳馥芬盈庭些小池風度亂藻萍些曲檻蕭
森敞浮清些軒閣明窻好談經些無諍三昧無爽靈些
歸來歸來得清寧些魂兮歸來木葉微脫洞庭波些菱
歌晚韻冷芰荷些水鏡圓魄淨翠蘿些清風徐來澹素
柯些纖雲天表澄練河些花竹映秀耀曲阿些秋華多
麗休羨考槃之適些歸來歸來不可以蹉跎些魂兮歸
來床間有書可娛目些架上有琴可橫膝些歸來歸來
無虛室些魂兮歸來墜露可飲落英可餐歸來歸來無

遙想些魂兮歸來荷衣蕙帶芙蓉集裳些北牖風清小
簾生涼些花覆簾低爐裊香些蘿屏曲映繞畫湘些粧
前明鏡舊日之光些歸來歸來返故鄉些斷香猶茜匣
遺芳些蕙帳空兮怨啼螿些故園回首豈無自傷些歸
來歸來無渺茫些魂兮歸來樂卉凝階艷秋棠些微雨
疎桐滴銀床些風月正美容與徜徉些樽中有酒羣集
流觴些歸來歸來無徬徨些魂兮歸來兄弟成行姊妹
連袂何汝二人獨遐棄些歸來歸來不可以久睽些魂

今歸來聚談竟日謔浪笑傲些花草參差堪臨眺些歌
雨送雲林端留照些歸來歸來速歸還些魂兮歸來冥
漠無倚日月無曜些歸來歸來一室之中豈殊調些魂
兮歸來胡然而久寓些桂露涼烟夕香度些閑宵漏靜
清輝徹樹些房櫳悵幌仍回顧些歸來歸來可疾趣些
去路茫茫無親故些長夜漫漫水無照些歸來歸來何
為乎誤些魂兮歸來朗景清冷素風吹些高秋搖落昔
同悲些白雲黃葉堪賦詩些蒹葭蒼蒼何無思些魂兮

歸來不可以久離些亂曰熠燿燦兮商氣清落芳蕤兮
鷓鴣鳴時不可兮復再得惜往日兮徒傷情風嫋嫋兮
思無極水滟滟兮秋望平蟋蟀兮無聲蟋蟀兮宵征又
曰沈寥天高兮良夜修空目斷兮懷離憂銀漢沈沈兮
月華流魂兮歸來無淹留

傷心賦

有序 沈宜修

昔人有攀桑條而泣涕覽搖落而興悲無非感時事
之移異物色之變遷也二女亡後倏焉經歲庭花幾

落夜月幾圓病中言語宛爾如在億昔儀容已成隔
世思忽忽以若遺心怦怦而常憾黯兮回風惜乎往
日蕭條野曠沈寥天高鬱無畔靡靡之痛歎不歸渺
渺之魂傷心若此聊賦斯言

夫何物之最慘於世兮情莫傷乎死生終翳翳之玄壤
永杳杳兮九京倏奄然而長逝欲一語而絕聲斷窮烟
於碧落若晞露之槿榮恨填膺而不息憤無控而難平
草荒涼而改色雲黯淡而凝橫盼音徽兮寂默觴遺韻

今悲盈是以鶻血流枯猿腸悽惻芳樹愁深霏絲怨織
春葉紅消秋蘭寒逼茫茫宇宙奚痛如極而迴思在昔
靡不瞻依顧復銜恤掌上珠璣端嫺治澹淑慎威儀溫
明愷惠婉約瓌姿如鄙稻之早辨聞絕絃以先知逗瑤
華於朗月襲花氣於羅衣容光麗而要眇德音靜以清
懿邈仙蹤之一去歸環珮以無期閉歲蕤於寂寞慘搖
落於芳時啟房櫳以欲喚驚斷絕而還疑情一緒而百
結恨萬縷而千思於是美誇燕趙才壓班劉容迴雪而

妍媸兮思裁雲以令攸飄娟媻之輕袂兮振舒采之織
梳曉傾鬟於菱鏡久遺佩於芸篝清言啟而斐亶逸韻
揚以閑幽吐芳蘭之秀潔含潤玉之瑩柔爾風流以頓
盡余愴懷以無休覩風寒之碧蘚覽霜冷之青楸殞桂
芬兮寂寂悽梧影兮悠悠每恍恍兮在目時忽忽兮遷
流笛怨山陽人遠雁哀隴首雲秋鶴去悲餘華表鳳飛
音斷秦樓感百哀之彌漫擣寸衷以若抽草無言而自
綠花歛黛兮如愁恨莫恨兮連摧圻哀復哀兮見無繇

恫玉顏之早謝若朝暮之蜉蝣迺又篋留蘭膩爐冷麝
烟斷明光於月下咽參差於花前粧臺靜而塵滿繡閣
閑以脩然風颯慄以紆結鳥哀鳴以多憐鏡孤芳而無
覽衣歇香以遺妍文牕窈窕永棄筆床翡翠長捐更以
鸞機罷織紈扇無鮮寒生綺幌零落花鈿琅函掩卷錦
字停箋怨蠟流殘兮照夜愁斟不復兮長筵自彩雲兮
一散悵明月兮空圓折芙蓉兮誰寄淚隨波兮潺湲煎
迴腸兮不息纏痛思兮連綿摧百卉兮無光蔽朝輝之

艷景蛛網縈兮殞宮奠漿陳而空冷捨此春華藉彼夜
永素魄慚形嫦娥弔影遙憶前歡何堪重省望歸魂兮
迢迢迥青燈之耿耿樹迷離於庭除蟲慘切於軒屏總
帳空垂靈几靜晝梨粉飄香疎枝影瘦風景不殊人物
非舊蕭蕭白楊烟光相逗至如空梁泥墜雁來燕歸朱
門悄悄斜日依依鎖藥欄之繚繞掛簾月之霏微風狂
呼兮雨泣秋木變而歔歔又若林花吹盡柳絮飄揚永
斷送春之句終無咏雪之章怨蟋蟀於夕露愴黃鳥於

青陽花放河陽之錦菊舒彭澤之芳無不悼生對景感
發臨觴動唧惆悵靜處徬徨看白鷗兮愁不去遶萱草
兮夏難忘魂徬徬兮恒慘絕涕浪浪兮時沾裳涕沾裳
兮情何已新夢回兮離思長欲一慟兮心哽咽望雲霧
兮空蒼蒼亂曰春光爛熳兮虛佳節冬日蕭森兮淒凜
冽茫茫代序兮徒自傷生死殊兮永為別

明文海卷二十二

欽定四庫全書

明文海卷二十三

餘姚黃宗義編

賦二十三

述懷一

述志賦 劉基

鮮余生之眇眇兮荷后皇之深仁具五氣以成形兮受
明命而為人體乾坤之粹精兮晞日月之景光漱飛泉
之華滋兮浥灑露之醇英製杜蘅以為衣兮藉蒞若之

菲菲佩琳瑯之玲瓏兮帶文藻之歲蕤朝濯髮於蘭池
兮夕偃息乎瓊苑願馳騫以遠遊兮及白日之未晚駕
輕軺之將將兮服蒼虬之駢駢遵大路以周流兮曳虹
蜺之委蛇挾長離以棄鵠兮欵閭闔之九門豐隆為予
先導兮百靈為予駿奔前燭陰以啓途兮賜凱風使清
埃覲北斗於文昌兮朝玉皇於帝臺食玄圃之丹莢兮
澡天潢之芳津激微焱於桂枝兮輕波起而龍鱗元都
不可以久留兮忽乘雲而遐征浮江湖之浩漾兮陵山

嶽之崢嶸野莽蒼以多榛兮路險隘而紆曲猥兪魚然
而攫噬兮蝮蛇蜿蜒以當陸鬱忡忡以怵惕兮適皇皇
以營營雨淫淫而不止兮霧黯黯以晝冥烏鳶號以成
羣兮鳳孤棲而無所楚屈原之獨醒兮衆皆以之為咎
欲振迅以高舉兮無六翮以奮飛將脂韋以從俗兮非
余心之所怡長太息以增欷兮哀時世之異常棄韶夏
而非聽兮登傑侏於中堂芘軒于以和羹兮脍鮑魚而
實俎斲梗楠以給爨兮束荆棘而為柱施罽麗於丘陵

兮怨魴鯉之弗獲虎兕逸於山林兮循戶庭以求索前
蒙眵以指途兮彊揚子使操轅命侏儒令舉鼎兮別都
盧使守閹歲冉冉而將頽兮日曖曖以就昧松栢摧而
根死兮江河化而為澮秣予馬於不周兮整予轡於樊
桐無著龜以決疑兮迷不知予所從搏扶搖以為輿兮
攬列缺以為輪駘清鸞之茈茈兮超烟靄而上浮梁天
津以濟河兮睇紫薇之神闕開明怒目而電視兮貌豹
吼而山裂進無人以為之先容兮欲自獻而不敢氣勃

鬱以憑中兮心惻傷以憺懔過少微而歷明堂兮就軒
轅而陳情雷霆砰其隱鱗兮馬辟易而不行訪六符於
泰階兮求民極之所在咎繇不可以作兮競狂直以為
罪凌天街以徑度兮造旬始而瞻西清衆畏讒而卷舌
兮孰能白予之忠誠怙悻其無止兮然悄悄以狐疑要
傅說於箕尾兮命靈龜使占之曰有名必有實兮若形
影之相因相福極出自天兮又何尤乎世之人鼎胡跣
而不烹兮旂胡張而弗麾孤不可以射侯兮駟不可以

策而馳衆蠕蠕以朶頤兮若顏波之東趨謂翬翟為弗
章兮愛羸豕之負塗方不可刑而規兮白不可涅而黑
悲桂椒之芬芳兮與朝菌而偕落殷比干之剖心兮時
豈不知其聖人魯仲尼之過化兮焉役役而無所容其
身由彊義而罹殃兮惠直道而被黜子胥忠而殞命兮
伯夷清而不食將登山而迷路兮欲涉水而無航東西
南北安所之兮顧焉擇其所長神冥冥而不下兮龜又
厭而弗告思糾結而不抽兮意恍惚以震悼忽濫汜以

遐舉兮行遊目於太荒羲和不可扳而留兮恐年歲之
弗將駕廣漠而南征兮叫重華於九疑山岑岑以蔽天
兮江蓀蓀而不可窺澶吾道夫西陲兮聽鳴鳳於岐陽
慨禾黍之離離兮梧桐摧而不生浮龍門以汴河兮訪
夏后之遺跡川瀆混而不分兮鯨鯢起而人立攬駢轡
而迴驚兮謁陶唐之舊京無衣裳以禦寒兮哀蟋蟀之
悲鳴心悵悵以增傷兮神夢夢其若醉淚洛洛以交流
兮憂湛湛兮而來會傳說之版築兮無武丁其誰舉夷

吾不逢夫鮑叔兮竟淪沒於囹圄推竭心以服勤兮上
介山而立枯種霸越而滅吳兮終刎頸於屬鏤樂毅升
於金臺兮何遁逃而走趙周條侯之耿介兮卒含怨以
餓餒忠有蔽而不昭兮道有塞而不行名不可強而立
兮功不可期而成李斯上書以相秦兮空自陷於罪尤
買臣顯而戮辱兮豈如負薪之無憂魚赴餌以中鉤兮
雉慕媒而膺鏑鳳凰翔於丹穴兮又何患乎矰弋返余
旆之旖旎兮還予車之鞶鞶采薇蕨於山阿兮擷芹藻

於水濱冽玄泉以瑩心兮坐素石以怡情聆嚶鳴之悅
豫兮玩卉木之敷榮挹清風之泠泠兮昭秋月之娟娟
登高丘以詠歌兮聊逍遙以永年

四愁賦

黃淮

冲虛子索居屏跡息慮省躬因洞觀夫玄化爰有感夫
深表年與時馳羗景物之不異情隨事變何忻戚之靡
同若乃陽和煦育品彙昭融穠李芳桃耀繁華於朝日
金鞍綉轂醉羅綺於春風轉歌喉之窈窕藹香霧之空

濛蹋鞠鬪雞斯遊未已爭妍索咲其樂何窮我則低摧
喪氣憂悶填胸虛負歲華之遷易那知花信之始終聽
簷外鳴禽空教夢斷見牆頭飛絮始覺春濃既窮途之
寂寂奈幽思之冲冲至若蘭雨傳香鷗波漲綠開池館
以來南薰折荷蒲以泛醺醪和白紵之新詞歌采蓮之
麗曲或鳴琴以俯清流或岸幘而倚修竹扇影風泛兮
齊紈簟紋涼透兮湘玉我則衆穢流腥炎蒸蘊毒飛蟲
旋繞遣拂何暇於言談流汗沾濡起居不離乎裋緡紛

然塵垢之侵肌，菽爾竈烟之迷目，焉敢肆其趨蹌，豈能
頻於盥沐，及夫序屬三秋，金風扇冷，時維殘臘，素雪揚
威，盼鄉信之沈迷，目窮雁字，苦凝寒之慘慄，體怯鶉衣，
漏沉沉兮長夜，魂眇眇兮親闈，警鐸傳聲兮駭膽，而慄
魄殘燈照影兮洒淚，而長吁於斯時也，爾乃鬪勝誇奇，
携朋拉友，浥九霄之沆瀣，待月南樓，玩六出之竒葩，張
筵北牖，列侍女擁歌姬，薦嘉肴稱壽酒，婉兮媚物之情，
哆兮懸河之口，第恐為樂未央，而盛時年貌之不留，又

豈知窮愁迫感而羈人歲月之易久也嗟夫予嘗究夫
庶物之理萬化之原是非互見得失相沿競侈靡縱遊
觀則流之於放閔阨窮極愁苦復溺之於偏况消長盈
虛實玄機之旋斡而窮通壽夭豈人事之能遷是故陋
菴簞瓢回也不改其樂易箒待盡參乎獨得其傳又若
陸續顛危而不忘乎孝行史遷殘毀而猶校夫陳編韓
退之貶潮陽而侃然正大之氣上下霄漢杜子美走川
峽而懇乎忠孝之情屢見詩編此皆騰輝於汗簡非徒

誇大於浮言復有至人道備德全不與時化不為物牽
胞悲喜於一致安性命之自然匪棘匪徐留心澹泊之
域爰清爰靜游神冲漠之天斯其盛矣我願學焉

戎旅賦

楊慎

恭承恩譴兮于役滇越捐珮江皋兮解紳雲闕三陟崔
崔兮九折舐舐不日不月兮遂屆窮髮撫孤旅而悁脰
兮揜衆困而慙心悵圭籥之駸遄兮逾四稔而迄今父
母孔遠兮懿親離而北南類連遠而分衢兮似同波而

殊溲慈鳥忻於共巢兮恒鳥悲乎異林彼纖羽之微族
兮亦命侶而跼跼何生人之含靈兮乃離羣而弗如咏
清人之介駟兮感放士之鳴鶉姬公畏於熠燿兮尼父
喙夫螻蛄屈托乘於螭豹兮莊寄徑於鼯鼯在聖哲而
固然兮攬古人而重歛哀吾生之罹郵兮背中土而播
荒粵戴盆而伏巖兮望崦嵫之末光神怳恨而蜚颺兮
形臠卷而僮囊睇孫水之浩渺兮瞻靈關之峻極聆猩
猩之夜啼兮履狒狒之朝跡尋終古之攸居兮問祝融

之昔宅胥靡登而不懼兮魑魅過而奚慄岨岬颯揚兮
含沙影流喟茲徂春兮忽焉杪秋月兮殊於九州兮瘴
卉華而歲周若有人兮好我携旨酒兮思柔采檳榔兮
綴扶留贈相離兮結忘憂寒鷄鷄兮為脯露江魚兮為
脩滇歌兮爨舞白日遊兮玄景浮獨持觴而懷遠兮雜
歎歎其向陬遂還軫而休室兮隱零雨乎寂夜引簟枕
而假寐兮遙夢歸乎親舍家人嘻以款語兮閭里紛其
來訝衆鷄鳴而驚余兮晨光昀乎東射悵夢懽而覺悲

兮淚承睫而交下假靈氛以歷古兮援龜頌兮余謝曰
明庭其布德兮子行歸乎肆赦系曰莫靡荒服自中古
兮日月之表燭不普兮章亥步窮禹罔睹兮蘭津開道
行商苦兮碧鷄望祭使者阻兮余亦何為恒此土兮金
躍不祥順不忤兮樂天知命去何憚兮

續思玄賦 并序 桑悅

昔漢張平子以圖身之事吉凶隱伏難明作思玄賦
予居京師數月觀之人情物理有難曉者因自號思

玄居士為續其賦云其詞曰

惟大化之茫茫兮邈普蕩其無垠極浮氣之幹營兮淘

五行以鑄身

五行之氣糅雜不齊故稟氣多濁曰淘天意為之去濁來清者矣

留帝則

之精鑿兮抱羣聖之貴珍

列聖所貴同此性善

流涓涓以瀉澗兮

糅滿湊而夾塵

喻天理幾微雜於物欲

穩衡衡以徵濾兮膠谷投

以逗真

勝私復禮如是

出清冷於燂霍兮歸鎮靜於紛纒混太

初以翺驚兮悲眾物之不純

明出仕由

繫長江之湛湛兮

窈窈其泚泣湜有瀨兮芬苾有芷

二句屬典三百篇家法

茹秉德

以鼃飢兮紛或迎而迪理孰有濡而不潤兮孰有翼而

不起吐火霧以糅錯兮憚毫光於一指孰啣啣以滿聽

兮攝霍嗚乎在子

汲冢周書云周時有獸名曰在子

餐桃漿於金墉兮

味甘露於沃渚

張華博物志沃渚之野有甘露食之人壽千歲

謂肝腸之葷穢

兮薄天闔而叱止汨淵居以沒景兮作溟漠而延佇田

甫田昉昉兮鑿播稗而藝黍懷美人於寥廓兮敢遺芳

於下女彼古聖之涵被兮翼踵輿於平丘事慄慄於刻

木兮

黃帝上仙其臣刻木以朝諸侯

朝鬻鬻於委裘矧祖宗之渥德兮

又蓋臣之好修拔傅說於版築兮舉甯戚於飯牛巢父
出而就祿兮州支起而運籌咀宣尼之委脯兮觴三五
以遨遊恨毫芒之不建兮還貧賤之可羞攬明月於燕

臺兮逝將去而夷猶閉旅關以靜俟兮間徙倚乎長皋

冀植葱之成韭兮

埤雅云王道
明葱為韭

恐蘭委而化茅鑿朋詒

之樸滿兮媿戚投之佩刀憑旱雲以輸棕兮痛賈生之

弗遭

賈誼傷已不得行
道於時作旱雲賦

悵歷仕之不遇兮軫仲舒之賦

騷

董仲舒作
仕不遇賦

捫萬象以般礴兮亦何自失於囂囂守專

誠於拯物兮撫大化而鬱陶初予選日以朝宗兮馬垂
頭而玄黃假詹尹而詢占兮衡氣機而莫量執稷契之
陳鞞兮佩伊呂之餘囊觀天暉以探兆兮鷓鴣忽鳴乎
中堂進揆途而聽瑩兮遐離則而傍徨荃育德於深宮
兮開明堂而聽政目絕傾乎柔曼兮耳不聆乎衛鄭役
田文以接士兮驅巷伯而治佞優摯御之岳岳兮賞從
諫之羸正向子遷乎卑室兮沈潰徙而出境五侯負乎
羈紲兮三家奔乎詔令圖澄長髡以力作兮左慈判眩


以委命嘗九天之榎味兮和鹽梅以調證審八表之虛
奏兮進藥石以愈病才有峻而莫嫉兮功有大而莫競
光龕煒以昭近兮惡私思之燈燭刑垣坎之昭示兮邇
擊珩其必戮溫詔令以參繚兮郵遞冰於春谷崇國整
以懷夷兮曾鞠武之可躋倡優拙而訥訥兮吉士悃悃
而惡祿披端練汰乎飛漓兮躬質亮迴乎華褥鎬羸遺
之并噬兮克限田以為躅力儲豐以熟凶兮毀璧珠而
比穀鑿尤物之為痛兮炎禎祥而豫撲礫不遺於鰥寡

兮金精披於伯牧扈直毫以臨匱兮稽回忠而必錄心
應龍而自畫兮浚滌淤而疏瀆務根本而剝華兮一四
海而同俗淵洋洋以逝鱗兮野伎伎而奔鹿悵茲懷之
莫展兮臨河水而予于衽大易以行藏兮冀徵顏而判
辱紛翼翼以闞參兮何玄理之難徵孝婦稿禾以彪寃
兮子推抱樹而隕生雨采孝而密意兮火焚忠而莫靈
魯陽何揮而日駐兮秦青何唱而雲停耿恭何拜而泉
湧兮鄒衍何嘆而霜零共工何觸而崩山兮杞妻何哭

而隕城詢往牒以昭晰兮胡邇鑿之冥冥諱本初而瑩
察兮不外蝕而虧盈盼中遠以旋車兮且縱覽乎八荒
披雲夢之霧褐兮表赤城之霞裳騎白鵠以上騰兮引
牽牛以服箱離雲旗之藹裔兮弄電幟之輝煌江祿邀
予於江淮兮姬晉歌嶠而稱觴懷所美於方壺兮脩然
贈之以扶桑容成愜予之才藻兮雙成訾予貌之不揚
悵形容之迭洩兮敢徙倚於帝鄉鋪予仁為木德兮流
予智為天潢融予骨骼為四岳兮化予津液為三江

鋪予

仁以下四句有楚詞以來無人道得混吾我而俱喪兮獨與道而翱翔顧茲遊之可樂兮念墜崖而怵傷苟吾真之未返兮焉斯世之可忘



明文海卷二十三

謹案卷十九第六頁前五行布哈舊作不花今改

後做此 前六行額森舊作也先今改後做此

後四行巴延舊作伯顏今改後做此

欽定四庫全書

集部

明文海卷二十四至

詳校官編修_臣錢棐

主事銜_臣徐以坤覆勘

總校官庶吉士_臣倉聖脉

校對官中書_臣石鴻漸

謄錄監生_臣包文訓

欽定四庫全書

明文海卷二十四

餘姚黃宗義編

賦二十四

述懷二

述歸賦 何景明有序

僕聞之殊途者不可以同觀異趣者不可以強翕故嗜筭者不媚之以瑟好圓者不進之以矩何則殊途而異趣也故賈子投荆南仲舒屏江都屈原遊澤畔

三子者非容之不能謀有不合有不可以容者矣故射者不為人易其穀琴者不為人改其操故師可易而法不可易也是以物有不以貴易賤富易貧榮易辱者矣故茂草不負垣美穀不生轍懼所托者非也是故求樂其心者不求華其身求顯於後者不求耀於今故夫子周流刪述墳典筆削魯史左氏者著國語馬遷抽史記荀卿董子之流皆有論譔大抵困屈窮阨發憤作述茲數聖賢者寧徒耀於當世哉僕少

執寡昧竊有慕於古人之義弱冠即仕出入班行者
已越六歲頗有齟齬之嘆焉正德戊辰皇上御極之
三年詔許罷歸田里得侍親膳既荷洪宥殊協夙情
於是始欲究著作之原博覽歷之勝竊附一家之傳
庶艾不稱之戒僕嘗以漢之文人工於文而昧於道
故其言雜而不可據疵而不可訓宋之大儒知乎道
而嗇乎文故長於循轍守訓而不能比事聯類開其
未發故僕嘗病漢之文其道駁宋之文其道拘反復

求斯尚未有得要之鄙意則欲博大義不守章句而於古人之文務得其宏偉之觀超曠之趣至其矩法則閉戶造車出門合轍不煩登途比試矣然又欲傲子長好遊之意抗志浮雲徹迹九有以博其大觀以成其文章斯亦不墜古人之餘烈哉於是叙出處之槩援聖賢之風揄始終之志作述歸賦豈敢自附於前哲用以最之於將來矣辭曰

有申氏之遺封兮吾顯祖乃肇家洎大人之有立兮遂

振落而揚花爰伯昆之繼美兮惟末身以降予寔獲夢
之曰吉兮日舍寅而筮嘉予既承此幼美兮懼服志之
不遐登隴坂之陂陀兮泛涇渭之洪波極峻函之重塞
兮由惇物與大華覽艷鄙之餘風兮沂漆沮之遺歌究
城隧之湮沒兮哀二世之禍羅雖孺齒以隨侍兮虞年
歲之日加飭華驥以西反兮恐修路之蹉跎忽天門之
廣開兮值日月之盛明願自飾以進君兮得近君之末
行鬱文昌之中興兮聳圖闕之印印揭華蓋於正殿兮

翼玉闈之與金廂塊層臺之隆起兮嚴複道之委長儼
宮觀之榮瞻兮接修翼而翱翔奉鸞車之清塵兮竊黼
帷之下光服恪勤於朝夕兮冀予衷之必揚倏天地之
易位兮星辰錯而無綱聿迅飈之亟至兮會浮雲之徂
征憂雪霰之交增增兮履中庭之凜霜紛衆莽之凋毀
兮恥松柏之孤芳豈予情之耿介兮實悲夫蕙華之搖
傷顧涓忱之莫彰兮敢幸澤而干榮仰皇度之寬綽兮
得屏放於故鄉歲戊辰予南驚兮臨大路而高車眺玄

宮之闐曠兮倚修城之曲隅汨潢潦之濡轍兮白日曠
而忽逾塵曖曖以蔽空兮風發發而揚衢視僕御之零
涕兮駭悲俛而不驅遵涿野之通行兮經蚩尤之故墟
陟燕昭之崇臺兮訊樂毅之所居覽冀州之圯址兮式
有虞氏之故都出晉野以于邁兮行谷亘以逶迂下滹
河之隍洲兮接邯鄲之修塗企魯連之風烈兮雖異世
其弗渝懲奢麗之覆亡兮憫豪盛之靡餘朝予濟乎洪
河兮夕弭駕於淮蒞逝道遙於故域兮耽樂極於桑梓

治丘墓之穢草兮考先祖之德裔侍顏色於閨闈兮服
左右於起居兮崖谷以畢處兮辭纓綉而不縻啓衡門
而葺茅兮循蘭徑之委委藝嘉菊之百畝兮采芳若於
中止伊予既秉茲之超寂兮恐邁吾之盛年檢古人之
遺美兮心竊倣而不敢愆樹六藝之旌節兮數百家之
遺編殫仁義之遐風兮略眇少之陋觀下何探之不幽
兮上何求之不玄乘二儀而列三光兮揜九區與八埏
揚素筆之芳烈兮修薄辭以為編綴大賢之緒論兮紹

斯文之未傳曷章句之足守兮發矩矱之自然汲時日
以迅厲兮惡名稱之不延昔夫子之喪位兮迺周流而
轍環望龜山之蔽翳兮去魯國而盤旋臨河水之洋洋
兮托哀操於鳴絃疾予心之迫隘兮願輕舉而遠旃羌
筮日以造遊兮嚴吾驂之翼翼飭桂衡之超駕兮牽采
旒以前飾乘白螭於上褰兮曲文蛻於兩服張孔雀之
翠蓋兮諧鸞音於下幅施結璜之委珮兮謹垂鞶之式
式涉洛水之靈波兮恐宓妃之不得使文魚以媒之兮

怨約言之我食抗予力於江南兮秣我馬於漢側豫遊
女之不信兮解我珉以明德順湘流而下沿兮望九疑
而夕發從二妃以並翔兮忌神人之相越離江夏以東
邁兮覓吳越之所在弔夫差之故宮兮尋伍胥之濤瀨
痛麋鹿之遊宮兮惋鴟夷之被害極禹穴之幽冥兮窮
會稽之勝槩慕太伯之清聖兮欽季札之耿介勗余馳
以流汎兮安崇卑之不臨北旱海之爛灼兮西太素之
積陰冰沍結以承輿兮霜霰零而接岑南陸屆以暑徂

兮或受蛇之陵侵取岵夷以極行兮盼東海之漫淫怵
天地之冥晦兮懼陵谷之隳沈速反轍以旋服兮息余
丘之茂林終養恬以順年兮厭予心之所謀世清濁而
莫察兮修短錯而不倫芻桂芝以秣蹇兮吝糠糲以飼
人豢罷牛而被以文服兮良馬棄而不陳賤馨烈而不
銜兮反逐臭於海濱予憂乎鳳凰之不鳴兮豈云係乎
麒麟彼蘭草之國香兮斂空谷以自珍聊委順以祈齡
兮吾又安尤夫人亂曰南有嘉木有鳥居之朝破其巢

夕則去之代愈下兮詩書道微曷曰予不還歸即彼昭
昭去彼汶汶今則靡榮後有問兮

司命賦 趙時春

客有以束芻加塗綵繪飾素金碧縈紆繡刺抹傅冠夏
后之章甫合軒轅之制度標曰司命之君祇承則畀福
祚惠而好我用啓窮固主人辭而難焉曰夫陽輝而穹
圓垂象陰翕而柔祇敷形故形則為水土木石象則為
日月辰星萃兩間之精華麗至道之模型要其所極則

參差難并究其所始則突奧窈冥蓋七聖之智而於此
乎迷四科之博而不能訂謬彼譎幻假此芻靈類燕人
削猴於棘端同偃師舞巧於周庭縱無求而不獲匪余
衷之所寧客曰迂矣子之言也夫三五淪喪剝落真元
陽明凋謝陰邪昂軒勢失則擎拳曲跪以取媚志盈則
招權攬威以自尊一波滌而萬濤漲孤壘摧而三軍奔
况七曜焉輪迴而兩間乎平反醜正惡直其徒實繁足
恭令顏其竟實敢豈眇膺之所能撐柱空於悒以蒙澶

屯勗余忠告慎爾出論余乃再拜而受之安於中堂致
蠲吉肅冠裳注椒醴奠蘭漿列馘餌獻饌糧鳴洞簫鼓
笙簧陳靈尊招巫陽望左右幸歆饗已乃兀然突然燭
影亂而神颺翔慄然竦然毛髮豎而相扶將若有恫喝
于隅虩笑於梁乃審厥相則恍惚兮難量乃聆厥辭則
嘈唧乎難詳叩之則無所應已焉則復來降良久巫致
嘏曰神靈訊汝謂汝有所凶吝而求祥乎汝之祥由天
神不能逆天而取殃謂汝有所咎尤而懲創乎汝之尤

由已神不能易汝之肺肝而柔汝之剛腸夫不揆於人而於鬼乎厚望不圖於誼而受俗之羈韁悲世所以馳騫追逐而卒仆僵者也吾且示子以廣大之論遊子於曠逸之場下扶乎地維上觀乎天閭騁雋永之至辨析聖教之微茫明以語子子其聽印蓋聞大造以天地為洪爐以山川為巨防鼓動之以五行鎔液之以陰陽綴日月使煽灼驅風雷使播揚於是鍾淳懿者茂以昌值澆漓者肆而狂譬諸爍金精者為百鍊之鋼鈍者為一

割之銚其間等倫皆可辨明返造物之本原此其較然大章者也乃若遭其窮阨值其淫汪變態萬端靡可久常或保其慝或賊其臧伊摯之任兮乃孕空桑重華之睿兮乃殞南蒼陶唐咨岳兮巢由深藏履癸復諫兮乃臣龍逢磻溪垂綸兮暮獲真王甘童舞智兮為趙鳳凰此則糅錯難齊事理或爽者也至若箕子陳疇於周而奴僂於商仲尼勁於夾谷而畏於宋匡齊桓雄於五霸而蛆出於床秦穆弘於乙丙而殉其三良此其始終異

故本末披猖者也又其甚者尤可悼傷接輿獨見兮楚
稱為狂三閭忠蓋兮爰投三湘伍員獻謀兮翻盛革囊
弘演納肝兮國破身亡著乎詩人之諷刺編為史冊之
輝煌然懷寶含瑜逢時搶攘既不其力覆用胥戕或有
義烈精誠感動玄黃長弘迸血而化碧鄒衍痛哭而飛
霜然猶乖世俗絕頸扼吭其餘齎志飲憤激薄乎三
光者不可以比方也窺古今之殊致感流波之相蕩合
至道於冥漠揆安宅於久常縱目乎紘垓之表神遊乎

夫何有之鄉窮通好醜孰能為之弛張進退虞豫孰能
為之低昂願含章兮藏器俟乎時運之芳勿韋脂兮模
稜永含愧於滄浪余聞斯言警悟倉皇方欲殫其要眇
療砭膏肓但見皓月覆地落葉凝霜向之所睹儵然而
衰矣

遠遊賦

并序

袁襄

余弱冠登朝讀書中秘繼官刑曹調武選武庫災編
戍湖州赦歸蒙薦起為南武選遷職方署員外郎尋

有廣西之命昔孔子乘桴浮海不以為陋廣西古百
粵也今海內同軌且余既仕矣安敢以遠辭乎爰作
遠遊賦以述事抒情焉其辭曰

沐鴻私於嘉運兮擢遺反於樊丘曳華綏以登進兮踐
舊京而嬉遊幸朝野之無事兮肆驩虞而靡憂謝文墨
之填委兮稽圖牒以諮搜差穀旦以休息兮爰嘯侶以
集儔升北山以遐眺兮溯大江而榜舟或閱武於廣場
兮或祓禊於清流尋廢興於六代兮仰駿業於皇猷念

無荒之有戒兮信佚樂而不偷之佐時之奇畧兮竟投
齋於僻陬駭顏駟之龐眉兮恠馮唐之白首嘆滯淹於
更生兮笑浮沉之楊叟羞子安之巧宦兮蒙良史之譏
醜偉潘仁之拙政兮賦閒居而不朽衆捷徑以窘步兮
固余顏之所厚獨修姱以委順兮諒余心之所取苟貪
婪以競進兮寧坎壈以自守昔孔聖之周流兮君子居
而弗陋羗下惠之直道兮遭三黜而無咎顧樗櫟之非
材兮雖棄捐其何有奉簡書以畏忌兮戒僕夫而啓行

出樵李之下邑兮游臨安之故城痛越霸既不終兮宋
社又以圯崩肅陽侯以先驅兮導浙水以揚舫感錢鏐
之雄武兮提尺劍以縱橫悼伍胥之忠憤兮浮鷁夷以
隕身忽怒濤之山立兮儼白馬以耀靈沿桐江以容與
兮憇嚴瀨之澄清躡高臺以長嘯兮懷哲人之典型於
是芳歲將徂玄冬告畢雨蒙蒙其下淫兮雪霏霏以蕭
瑟露霧曠以冥冥兮同雲暖其無色雁嘯嘯而南翔兮
日忽忽其西匿坐修夜之難旦兮步列星以太息繹寤

越之曩歌兮材士顛顛而失職心侘傺以紆軫兮思結
結而瞽惑水泉涸其不流兮石嶮巖而阻塞既僵偁以
川浮兮復崎嶇而山陟野蕭條而無人兮獸躑躅以屏
跡愁車殆而馬煩兮汨吾朝征而夕于役形枯槁以渴
饑兮精消鑠而內蝕魂涸瀆以踰佚兮涕浪浪而霑臆
撫壯年之不居兮恥修名之未立於是歷甌粵觀豫章
攀巖閣於江渚兮詠瑋辭以徬徨帝子不可作兮王生
亦已淪亡睇彭蠡之巨浸兮追鴻伐於高皇想湖水之

盡赤兮殪元兇於大黃剪鯨鯢於溟渤兮陋巨鹿與昆
陽謁羣忠於叢祠兮覩丹青之耿光甄孫許之壯烈兮
實後先以相望咸致命以竭節兮終身滅以名揚越臨
江以信宿兮矚玉筍之崇岡修降禪於漢武兮欽登封
之闕藏忽獻歲以發春兮迴青陽於幽谷烏嚶鳴其相
和兮麗冬榮之嘉木悲去鄉其日遠兮時反顧以蜷局
魏牟皇皇以戀闕兮嗣宗塗窮而慟哭何賢哲之遠觀
兮猶委心於榮辱諷龍蛇之至言兮勵浮雲以自勗聳

韓廟於袁疆兮哀逢辰之不淑黜百家以述聖兮排二
氏以箴俗雖馴鯤以開雲兮卒罹殃而貶逐弔楚纍於
江潭兮披騷經而三復椒蘭妬而搆讒兮嫉蛾眉而謠
詠怨靈修之不化兮傷郢都之傾覆式彭咸以自靖兮
葬汨羅之魚腹涉長沙以夙駕兮嗟賈生之天年遭漢
文之殊遇兮何卒困乎絳灌之巧言闢宣室以徒召兮
賦鵬鳥而自憐挺異才以命世兮竟齎志於重泉亂衡
陽之洪河兮厲沅湘之大川覽吳楚之上游兮極耳目

之偉觀瞻柳侯於永郊兮薦蘩蒞以羞筵世溷濁而壅
塞兮紛妬忌以蔽賢慨四子之一轍兮羌異代而同患
士不遇以永嘆兮諒自古而已然望朱垠以儼裝兮指
象郡而驤軌肆流目於南疑兮悵重華之野死蒼梧曼
曼以在望兮悼二妃於江之汜山龍嵒以造天兮嵐昏
昏而晝起桂樹叢生於巖阿兮春炎炎其若暑壤濱海
以沮洳兮土墊濕而恒雨猺獠娛以伺人兮咸雕題而
黑齒蝮蛇綦綦於中林兮蠶含沙於淵水雄虺九首以

鬻鬻兮封狐捷而千里何此邦之炎瘴兮固蠻族之所
止徵禹跡之所不到兮檢職方而未序詫漢帝之喜功
兮肇開拓而疆理猗皇風之泰昌兮界昆吾以為宇邑
五嶺以作藩兮括百粵以置吏朝越裳以重譯兮撫交
州而即叙眇余躬之陋微兮敷文教於茲隅戾泮宮以
振鐸兮選青衿之秀儒懼聖遠而言湮兮病曲學之支
離列四科以作人兮愧五教之未施憑丘墳以頤志兮
寄絃歌以自娛聞老聃之適戎兮講道德之玄虛蒙莊

遁於漆園兮馳放言以恣睢
虞卿窮而亡聊兮猶發憤
以著書苟斯文之未喪兮竊希志於前規
吾將籠今古以騁驚兮掇罔象之玄珠
亂曰去鄉遠遊心不樂兮自
冬徂春將焉薄兮炎州卑濕風土惡兮魑魅
晝出瘴癘作兮狐死首丘不忘故兮代馬
北風尚知慕兮世不我知羌誰愬兮歸兮歸兮
娛竹素兮

思歸賦 袁 袁

旅荒徼以羈處兮心忉忉而多憂
陽春逝以流邁兮曜

靈迅馳而不留涉恢台之炎夏兮赫焦灼以鬱蒸瘴曠
曠以中人兮觸沉痾以驟興寒熱搏而襲逆兮苦疢崇
之相乘乏單豹之內養兮二豎伏而伺升哀吾生之孔
艱兮逢百罹以備嘗進觸藩以跼踏兮退曳尾而摧藏
嘉魯連之肆志兮雖貧賤其何傷世好朋而習佞兮懼
婞直之構殃遯幽谷以逾紀兮忽奔走乎遐方豈好爵
之我縻兮實簡書之可畏收孟明於三北兮蒙羸繆之
渥惠奉周任之炯戒兮勉陳力以就位冀鉛刀之一割

兮庶伐檀之無媿老冉冉之將至兮疾疢糾其相仍俟
河清之幾時兮恐朝露之易零誦夫子之雅言兮疾沒
世之無稱紛王事之鞅掌兮顛天閣而乞身積頽思而
寢息兮憎愠愉以休惕喟中情之莫我察兮眷懷歸而
未得夜申旦以不寐兮就角枕而反側蟲齧帶以潛飛兮
聽空除之蟋蟀先秋氣以哀唵兮感時物之數易魂營
營以夢歸兮覩故鄉之髣髴歛驚寤以在床兮怡愴恍
而惓惓昔鍾儀之囚晉兮操土風而不忘彼莊舄之仕

楚兮詠越聲以傍徨覽季倫之奏引兮思娛老於河陽
繹陶令之賦辭兮修初服於柴桑人情各懷土兮豈必
經營乎四方余既不能徇華以苟祿兮又焉能棲棲於
此邦孔接淅以違齊兮軻濡滯而出晝欽䟽傅之炳幾
兮脫桎梏於組綬梁歌噫以竄稽兮梅掛冠以遯吳仲
樂志於園藪兮張興思於蓴鱸鴻冥冥於寥廓兮超繒
繳而遠徂非斯人其誰與歸兮永逍遙於江湖亂曰玄
鴉黑烏號寢宮兮鳳凰翩飛匿林中兮人各有心紛不

同兮靜躁殊趣貴中庸兮塊獨居此將安從兮我思古
人希哲蹤兮

內答賦

并序

許應亨

嘉靖己亥七月之閏余從兄至京師道齊魯之墟中
夜無寐徬徨起坐悼徃過之寢深懼將來之易溺怛
怛中熱撫几赧顏而作是辭

余徃耽此竒徑兮顧中道而背馳極曠遊之快心兮決
轡御而不羈白日既下西麓兮竊獨處此纍畸颺颺蔽

於大澤兮山鬼迎將以噬石巉巉以躡足兮水澌澌以披靡彼哲人立於高岡兮寡余裳戒以勿濟虎嶷嶷以肆翼兮將以食予之肝肺余方憤而莫知兮神怳怳以心醉忠言逆余之耳兮反迎之以罵詈披疾藜以為衣兮又紉之以為裳席荆棘以自娛兮雜蕝茨以佩囊狐九首而襲媚兮蛇蜿蜒以引吭涉流離而弗顧兮道差莪以徜徉心搖搖而不寧兮體靡靡以皆傷妻子泣以向余兮友朋招我以簡書此地不可以久處兮曷返于

之故居子烈祖之南徙兮固以振茲令圖洎乃考之仁
厚兮遵繩墨而不踰伯追躅於古哲兮既為世之大儒
子獨何其不肖兮自喪子之嘉模夫人孰能無過兮貴
速改之惟謹昔殷王之齊聖兮曰不吝以為訓顏氏既
以不貳兮後世稱其亞聖苟朝作而暮改兮亦云天之
明命辛受恥過而作非兮墜洪業以隕軀有渾敦之長
傲兮聖人投之於四陸惡無纖而弗滅兮微罔積而不
虞鬼神福善而禍淫兮天培栽而殛愚余雖聞而不繹

兮猶赧顏以忸怩乃已亥之孟秋兮膏吾車於北衢既
遠跡於塵陌兮遂肆心於詩書緬溽暑之既退兮又申
之以秋初風蕭瑟以怒號兮氣抑鬱而莫舒月既望於
東陸兮夜氣清而不渝達中宵而不寐兮獨慘慄而嘻
吁昔嬰身於湯鑊兮痛百創之在膚譬狂藥之喪心兮
赴水火而莫辭既號噉於南北兮復跳梁乎東西自安
止於污下兮惟佞僮之是師齒雖壯而猶弱兮氣方鼓
而復摧曩幼學之聰慧兮竊自比於瓊瑤慕吾兄之高

蹈兮將頡頏於青霄胡中道之廢墜兮滓異質以涇洿
使蘭茝雜於糞土兮豈云異夫蓬蒿雖往者之不可諫
兮懼來者之易殽諄曰宴安鴆毒不可親兮蝮首蠱尾
豈可矜兮君子明哲以保身兮孱士窮欲將戕生兮放
僻邪侈罔極桁兮戴仁抱義至公卿兮遷善改過有殷
之興兮長傲遂非桀紂同征兮

明文海卷二十四

欽定四庫全書

明文海卷二十五

餘姚黃宗義編

賦二十五

述懷三

閔獨賦 葉良佩

閔諒貞之獨立兮，貼衆險以乘危。蹇離披以隕獲兮，循本初而自思。始予之未有知兮，專六籍以為師。朝帶經於兒圃兮，夕發憤乎董帷。物何幽之不鏡兮，理何微而

不窺既釋以從政兮
焚亂絲其難治
索慮謀於古訓兮
判與彼而異宜
心無歸之茫茫兮
疑簡策之我欺
步徙倚而遙思兮
寐展轉而反惟
困極其必通兮
神恍惚兮若有得曰
道有玄機兮而靡定式
乘時制用兮妙存悟
識親賢爾輔兮稽古
自益任重惟毅兮篤
信靡惑惕靈魂以驚
悟兮奉神貺以周旋
抽詩書之秘訣兮萃
仁友以討論遺驪
北之粗跡兮遡九河
兮崑崙披義塗於棘
榛兮排私闥以為禮
門擧木蘭繼余佩兮
扈芳洲之芷

蓀冠切雲之寶昇兮明月懸宇帶擊衆讒嫉之弗回兮
猶汲汲乎疇昔之言夫惟被服之魁崔兮衆果愛然而
忌之加以險陂之偽名兮乃集羣怒而噬之衆口垂涎
之澆滄兮張怒目而睚眦怵鬱邑余煩寃兮雖百喙莫
之能解豈不歷情以陳辭兮荃詆余之善誑競服面而
背憎兮反撫予言以肆謗聯矰弋之在上兮覆深淵而
在下仰側身以發機兮俯置足之靡所念予初志之好
修兮今何以侘傺而邁殃將惟言語以階亂兮無亦擇

交之不詳世舉好朋而惡異兮余獨蹈其所怪揭吾日
月以孤行兮豈不招尤於曖昧仗貞信於幽明兮全形
軀之已多及年歲之未晏兮修初服其何為襲余芳兮
鏟余彩坐若忘兮行若待中以為廬兮和以為馬馳驚
於順適之途兮休息乎曠漠之野衆之不可勝兮險不
恬乎再試頌我過以成章兮書爾紳以自識

申臆賦 朱應登

炳哲靈以儀圖兮覩人文之攸章遡終古以橫跡兮羗

媵美之鮮雙紛總總之林府兮嗟要指之必同探寶航
於百濟兮豈珍錯之畢將吾形吾之內熠兮表鑽窄於
縱橫倘神解以貫一兮雖襞裂其奚傷彼固擁篲以清
道兮俟塵躅於周行惟體裁變於異世兮嘻末流之濫
觴曾大雅之弗程兮日仳仳以叛經鑿龐洪以頽靡兮
必國運而不昌彼英蕤之夕賈兮曷椅梧之在岡握道
樞於環中兮固匪夷之所思寧勃屑於微纒兮印超脫
乎馬羈歟神化之蟬蛻兮蓀獨宜於流裔謝鏤刻以返

沕穆兮萃要領之所之噓沆芒之元氣兮象萬有之陸
離掇九据以定玄兮指六緯之攢羅興九懷以繼騷兮
衍五際之委蛇舍黃虞以下索兮鬱秦漢之足跂彼渾
朴之未雕兮視大道為近而睠鬻爵之雖謬兮疇更倣
乎雌爨聆錚鑛之易節兮反黃鍾之克諧矢之曰貞予
見兮無毀甑篤余道兮發蒙翳馭吾氣兮合采齊律予
格兮絕譎鑑守質齷以揚確兮俾凡例之有挈叅歛摘
以袂飾兮既繁富而不剝鴻遠兮巨麗雋永兮敦大嶽

喋兮疏越流鬯兮撇捩崇作述之澗澗兮庶不乖乎所
制期絕代以高視兮以式耀於斯世嗚呼古人兮其儷
其儷諱曰已焉哉紫氣龜聲道日靡兮縱縱季世昧厥
義兮雕虎擒龍各相慕兮肆類終造校昔蹟兮而日叟
叟承流波兮顧瞻中道將安師兮矢心古若匪今懟兮

定志賦

陸容

后皇賦物兮孰畱孰優衆皆善世兮我獨離憂舌弗能
便兮意弗善投每行身以直道兮恒速悔而招尤初余

受言於先正兮曰放心之是求朝窘步於春水兮夕束
手於縲囚儼矜持以日慎兮馭朽索於八駟余豈不能
狎侮以戲豫兮懼加冠於沐猴彼囂囂之訾余兮謂余
作偽而宣驕叶凜斯言之可畏兮贅余心以縣疣余將
踵詩人之善謔兮襲老氏之同流逸軌範以騰鶩兮舍
舟航而泳游騁余志之猖狂兮與斯世而沉浮求諸心
兮不可念前功兮率由矧人情之難一兮紛萬狀其弗
侔苟甘心以徇物兮將何時而可休彼夷之峻絕兮實

惠之所憂和同若惠兮亦夷之所羞人固有能有不能
兮惟至聖其能周慨眇躬之涼薄兮夫孰告余以嘉謀
余惟口宣尼之便恂兮顏衛武之輯柔戒悻直於伯鯨
兮懲巧令於左丘苟余行之不悖兮尚何恤乎楚人之
咻亂曰已矣乎人言之啾啾兮匪時俗之偷兮實余德
之不修彼動容之中禮兮余將企斯人以為儔

幽鞠賦

盧柟

帝顓頊之嬋媛兮皇波注乎姬姜儻海岱蜿蜒於北陬

兮靈宗嘉牒於范陽選雲雷之靈霽兮

關

改此南服

淑浚土作甘美兮躡

關

之芳躅皇傑梧董道以迪惠

兮母氏靜約而告育曰余夢文杏霍飈於霄漢兮芙蓉

華而尚粹溘焱焰儵而進兮應龍齧齧而下眇倏恍悅

以隕虛兮覺懷妊而因基

余母夜夢
此有娠

蹇余降於衛許兮幼

好媵而岐嶷岌青雲之偉冠兮挾長劍之陸離朝晞髮
於崑崙兮暮濯足於咸池余長喟其歷之未塊兮勗修
余之菲芳裁薛荔為衣兮秉芙蓉之翠裳集茵蒞為

藉兮糝杜蘅以為糗揭旌於蘭皋兮稅駕乎芳之塘余
迅減鞞以高舉兮汨鍛翮而顛隕謂曾參之殺人兮談
市虎而成悞蒼蠅習習其貝錦兮魚目效明月之璀璨
嫫母慙以闕兮擯西施之頰媿而自眇蝮虺佻佻於

几筵兮戈鋌森森以刺余目既阨余之庠麗兮又謹之
以鈇拳低曼睩彼狴犴兮桀血斷而封矚盲闐怒以蹲
踞兮視將躩踞而矯鵠檻膠蜃以黜軋兮棟倔蝮而厲
翳縲纒纒於伏棧以苦余兮仍反接而窘臂耳嘈嘈若

有聞兮

闕

佛憎目炯炯以或見兮佇鏗勿而

闕

習以潤養

闕

精憧憧而往來覺塊然滯此

一方兮心惻惻而增哀艱鼠淫啮以嚙余髮兮魑魅含
睇而毯毳儼品品相喃以對泣兮禦糾糾而呵護般逮
余兮紛厖繫鵬鳥之巢蚊睫兮焉能戢此軀也枕雕虎
以燕憩兮又誰知不我虞也悲時晷之遄邁兮曜靈忽
其西藏微霜淪而下降兮恐瑤草之不芳高馳志乎雲
中兮稟精氣而相伴王喬衙衙而弗顧兮赤松告余又

荒唐行僂僂獨日暮兮安放乎不死之鄉橫衝波而微
舟楫兮天吳搖首而振怒歷泰山之坎軻兮魍魎齧眈
以當路猿狄蹇以在柙兮雖輕捷其焉去鳳凰之罹爵
羅兮縛芟芟之華羽抱鬱軫以顛處兮呼蒼天以為直
戒五嶽與嚮服兮裨河海使聽殛咎繇遠以不聞兮玄
武違而莫惻何羣神之豐豐兮靈炳耀而罔恤夫余既
不能蟬蛻於茲蕪穢兮眇棄風而長驚心結思於大荒
兮魂煢煢而上度激青雲之霏霏兮飄風回而霽霧載

玉女於後乘兮飭豐饗以先路羲和儼以馱稜兮望舒
翥而傲御征輕輦之闐闐兮八鸞鏘鏘以迴步承雲霓
之氛靄兮靈旂繽紛蟉虬乎翠羽挹朝霞以為食兮吸
沆瀣之精英漱華池之飛泉兮聆鈞天於帝庭素女涕
泣以淋浪兮間絙瑟而吟嚶處妃歛歛以結軫兮潛咨
語而沉情余凌軫虛而佚蕩兮將擊結乎三光換余轡
而馳騁兮問元化於勾芒採三秀兮眺瀛洲之微茫弭
余節兮聊解珮乎扶桑睇南州以凌厲兮嘉桂樹之叢

叢召風伯以驅燠兮謁炎帝於清宮何蒼梧之翳靄兮
重華穆以揚靈湘密鱗而瀟灑兮二妃胡為而弗從決
白門以西望兮覲蓐收於金樞氣濔濔以莽曠兮薄暎
眩而誰須觴王母之仙姝兮挾瑤池之芳都指玉勝以
為約兮歌白雲以相愉荃既婦余以好艾兮絕弱水而
進輅齊玉轂之礪礪兮指寒門而並驚軼鐘山之幽駝
兮今照之以燭龍召玄武為備禦兮勾辰翼乎紫宮託
鷺鳥為之先後兮問太乙之繚垣靈剡剡以黜約兮鳳

凰承旂而飛軒雷師礮礮轟礚以震盪兮列缺偏爍而
施鞭護鬪負以堪余兮闐咤噁而俾還卒攬涕反此舊
都兮潔筵尊從卜乎巫咸曰天地無隘兮物無終始羸
化互渝兮幹流遷徙形氣轉薄兮或浮而沉造化沕穆
兮禍福無門聿性命之難言兮誰知其極萬物糾以霧
盪兮又安所止息惟大人齊物我兮以天地為廬舍總
山川於毛髮兮騎日月以為馬夫有虞之潛歷阪兮當
厯數之在躬夏后胼胝而陟大寶兮季有光於黃熊震

龍隸而夏積兮顧駕禍於周庭白魚躍以膺大命兮劉
氏顯而有功奚五羊以自鬻兮由余振於西戎尚鼓刀
於海濱兮仲父射鈞而桓榮仲連談笑以却羸兮胥重
繭而存楚條相后而餓死兮鄮搖筆以光輔墨不黔以
衛道兮孔轍旋而微伍光狷介以自湛兮夷顛頷而振
古大道固無涯涘兮行焉知其所如惟恬澹與寂寞兮
斯貞人之攸居從委命而察流兮遊寥廓之鄉忽喪我
而無是兮觀泰初之茫茫余託蜉蝣與遊兮曾日月之

徜徉忽歸魄於玄壤兮又何足傷勉修余之傲服兮珮
芳澤之幽蘭紉揭車之落英兮褰江籬與射干飾翡翠
而綴珠被兮爛的皪而芊眠組綺縞而飄颻兮下結之
以雙璠余婉美而自鑑兮何媒妁之可攀夫君眩而弗
御兮亦余心之嫵嬛系曰天地緼綸何時明我欲見之
心徬徨輾轉懷憂祇自傷超軼絕世窮大荒帝極洪洞
不可量絨悲歸來卜巫陽勵志肥遯含大章獲我所思
樂無疆

欽定四庫全書

明文海

十

明文海卷二十五